

avril 1642

EDIT DV ROY,

PORTANT CREATION

de trois Tresoriers Receueurs generaux, ancien, alternatif, & triennal, du droit de Seigneuriage, ordonné par sa Maiesté estre leué sur toutes les matieres d'or & d'argent ourées, hors ses Monnoyes : Comme aussi trois Controolleurs generaux ancien, alternatif, & triennal.

*Verifié en la Cour des Monnoyes le 17. Iuin
mil six cens quarante-deux.*



A PARIS,

Chez SEBASTIEN CRAMOISY Imprimeur ordinaire du Roy, & és Monnoyes, rue S. Iacques.

M. DC. XLII.

Avec Privilege de sa Maiesté.

STANLEY
UNIVERSITY

Case
F
39
326

1642 fL

THE NEWBERRY
LIBRARY

21818



OVIS par la grace de
Dieu Roy de France &
de Nauarre, à tous pre-
sens & à venir, Salut.

Ayant de tout temps reconnu que la
facilité du commerce, & richesse de
nos Suiets consistoit en l'abondan-
ce des monnoyes d'or & d'argent
ayans cours, les predecesseurs Roys
& nous, aurions fait plusieurs Or-
donnances, tant pour empêcher les
abus en la fabrication d'icelles, que
pour encourager les ouuriers Mon-
noyers à nous bien & fidelement
seruir. Mais depuis que le luxe s'est
glissé dans l'esprit de nos Suiets, nous
auons veu que toutes les matieres
d'or & d'argent, qui cy-deuant e-

4

stoient employées en nos Monnoyes, ont esté conuerties en meubles & vaisselles; ce qui a reduit toutes nos Monnoyes en chommage, les Maistres des Monnoyes estans dans l'impuissance de pouuoir travailler par le surhaussement desdites matieres, que les Maistres Orféures ont introduit pour satisfaire au luxe; & ce principalement parce que lesdits Maistres des Monnoyes sont obligez de travailler sur vn prix certain qu'ils ne peuuent excéder, & sur lequel ils nous payent vn droit de Seigneuriage & remede, outre que leur brassage est taxé. Et au contraire les Orféures, par vn monopole dangereux, ont iusques auourd'huy, pris la liberté de vendre & acheter les matieres à tel prix qu'ils ont voulu, & se sont exemptez de payer ledit droit de Seigneuriage,

qui nous appartient plus legitime-
ment sur l'orfèurerie, qui n'appro-
che pas de la consequence, ny n'est
de la recommandation pour l'utili-
té publique, comme est la fabrica-
tion de nos monnoyes. A CES CAV-
SES desirans empêcher à l'aduenir
ces abus, & oster le moyen de fon-
dre nos monnoyes, par le gain que
pourroient faire lesdits Orfèvres e-
stans déchargez dudit droit de Sei-
gneuriage: Nous auons par nostre
Edit du mois de Septembre dernier,
ordonné que ledit droit de Seigneu-
riage seroit leué sur toutes les matie-
res d'or & d'argent qui seront ou-
rées en ce Royaume, hors nos
Monnoyes, ainsi qu'il est plus à
plein declaré par ledit Edit enregi-
stré en nostre Cour des Monnoyes,
& où besoin a esté. Et pour faciliter
la leuée dudit droit, apres auoir mis

cét affaire en deliberation en nostre Conseil, où estoient plusieurs grâds & notables Personnages de ce Royaume, nous auons créé & erigé en titre d'Office formé & hereditaire, creons & erigeons par ces presentes, trois nos Conseillers ancien, alternatif, & triennal, Tresoriers, Receueurs generaux du droit de Seigneuriage, que nous auons par nostre Edit du mois de Septembre dernier ordonné estre leué & payé par les Orféures, Affineurs, Tireurs d'or & d'argent, & autres trauaillans desdites matieres, sur tous les ouurages d'or & d'argent qui sont & seront fabriquez & vendus dans l'étendue de ce Royaume hors nos Monoyes: & trois nos Conseillers aussi hereditaires Controolleurs generaux dudit droit, ancien, alternatif, & triennal: lesquels Offices neantmoins

pour ont estre possédez par vne ou
trois personnes, coniointement ou
separément, ainsi que nous auise-
rons : aux gages tous lesdits Offices,
sçauoir chacun desdits trois Tresor-
riers, de trois mil liures de gages here-
ditaires, & lesdits Controolleurs de
trois cens liures chacun, aussi here-
ditaires, faisant en tout la somme de
neuf mil neuf cens liures. Et aux
droits, pour lesdits Tresoriers, de
dix-huict deniers pour liure de tou-
te leur recepte & maniement, cha-
cun en l'année de leur exercice : &
aux Controolleurs aussi chacun en
l'année de leur exercice, de huict de-
niers pour chacun marc d'argent ;
& dix sols pour chacun marc d'or
qui serót par eux marquez, ainsi qu'il
sera apres plus au long declaré : Tous
lesdits gages & droits à prendre a-
uant toutes autres charges & assigna-

rions sur les deniers qui prouien-
 dront dudit droit de Seigneuriage :
 lesquels gages & droits nous vou-
 lons estre payez , à commencer du
 premier Ianuier de la presente an-
 née , de quartier en quartier , &
 en la maniere accoustumée, ausdits
 Officiers , par celuy desdits Tresor-
 riers en exercice. Et outre voulons ,
 que lesdits Controolleurs puissent
 commettre par toutes les Villes où
 il y a maistrise d'Orféurerie , pour la
 marque & leuée dudit droit de Sei-
 gneuriage. Et pour plus fauorable-
 ment traiter ceux qui serót par nous
 pourueus ausdits Offices, Nous vou-
 lós qu'ils ayent & iouýssent des mes-
 mes droits, honneurs, prerogatiues,
 priuileges, fráchises, libertez, exem-
 ptions , que les Receueurs gene-
 raux & Controolleuts de nos Fi-
 nances de la Generalité de Paris, &
 que

9
que leurs Offices leur soient con-
feruez, à leurs vefues, hoirs, & ayans
cause, pendant deux années, à com-
pter du iour de la premiere proui-
sion, sans payer le droit Royal, que
nous auons ordonné estre payé pour
la conseruation des Offices heredi-
taires, par nostre Declaration du
mois de Feurier dernier; apres les-
quelles deux années expirées, nous
voulons qu'ils soient receus au paye-
ment dudit droit ainsi que les au-
tres Officiers creéz hereditaires,
sans payer aucun prest ny auance,
dont nous les auons déchargez &
déchargeons par ces presentes, en-
tant que besoin est ou seroit. Et afin
que nostredit droit de Seigneuriage
soit exactement leué, Nous voulons
& nous plaist, qu'il soit fait plusieurs
poinçons tous semblables, portans
deux L L couronnées, pour estre

par lesdits Tresoriers distribuez ausdits Controolleurs par nous presentement creez, ou aux Commis par eux, pour marquer desdits poinçons tous les ouurages & matieres d'or & d'argent qui seront d'oresnavant ouurées & vendues hors nos Monnoyes; lequel Controolleur à cet effet sera obligé de se trouver, ou vn Commis pour luy, en toutes les Maisons communes des Villes où il y a maistrise d'Orféurerie, aux iours destinez pour la contremarque, pour apres les essays faits des matieres ou ouurages apportez, & la contremarque auoir esté apposée par les Iurez Gardes de l'Orféurerie, ledit Controolleur enregistre les noms & demeures des Orfeures, ou autres qui auront apporté lesdites matieres ou ouurages, avec la quantité des contremarques qu'ils au-

rôt remportez : auquel registre chacun desdits Orféures, ou autres sera obligé de signer au bas de l'enregistrement de ses matieres & ouurages, afin qu'auant la brunissure, perfection, & ventes d'icelles, ils les apportent à iour destiné, au Bureau par nous estably, pour estre lesdits ouurages marquez de nostredit poinçon Royal, par ledit Controoleur, en payant de trois mois en trois mois par lesdits Orféures, ou autres apportans lesdites matieres ou ouurages, nostredit droit de Seigneuriage és mains de l'un de nosdits Tresoriers en exercice, ou vn Commis pour eux, auquel ils seront obligez de donner bonne & suffisante caution; à faute dequoy ils seront contrainsts de payer ledit droit comptant, & ce à proportion des pezées qui seront faites des matieres

ou ouvrages portans ladite contre-
marque des Iurez Gardes de l'Or-
féurerie. Et pour rendre la loy plus
generale, & sans exception de per-
sonne & que sous pretexte des ou-
rages faits, ou de la vaisselle que
nous faisons faire ordinairement
pour nostre seruice, ou changement
& refonte d'icelle, ou d'aucuns par-
ticuliers, nous ne fussions frustrez
de nos droits; en ce que l'on vou-
droit pretendre qu'elle ne fust su-
iette au payement desdits droits :
Nous auons declare, disons & de-
clarons par ces presentes, que nostre
vouloir & intention est, que tous
les ouvrages d'orféurerie generale-
ment quelconques, soient vieux ou
nouveaux, qui sont & seront à l'au-
enir ouurez hors nos Monnoyes, &
vendus vn mois apres la publication
des presentes, ou exposez en vente

sans auoir esté enregistrez & mar-
 quez dudit poinçon, sans auoir ac-
 quitté ledit droit de Seigneuriage,
 seront confisquezz, les vendeurs pu-
 nis corporellement & décheus de la
 maistrise de leur Mestier, & les ache-
 teurs condamnéz en l'amende arbi-
 traire. Tous & chacuns lesdits Or-
 féures, Tireurs d'or & d'argent, &
 autres trauaillans & trafiquans des
 menus ouurages desdites matieres,
 sur lesquelles la contremarque des
 Iurez Gardes ne s'applique, seront
 tenus, à peine de confiscation d'i-
 ceux, & de punition, comme des-
 sus, d'en faire faire les pesées audit
 Bureau; pour apres les auoir fait en-
 registrer, & signer audit registre,
 suiuant icelles payer nostredit droit
 de Seigneuriage, auât que d'en pou-
 uoir faire la vête. ORDONNONS pour
 cét effet à nosdits Tresoriers & Con-

troolleurs, de visiter à iours non
 preueus, les boutiques & magasins
 de tous les Orféures, ou autres tra-
 uailans en or ou argent hors nos
 Monnoyes, & saisir sous nostre
 main les ouurages qui n'auront esté
 registrez, & qui n'auront acquitté
 ledit droit; leur donnant pouuoir
 de ce faire: Et ce fait, remettront
 leurs procez verbaux desdites visi-
 tations & saisies pardeuers nostre
 Cour des Monnoyes, ou autres Ju-
 ges ressortissans en icelle, afin de
 proceder contre les delinquans par
 les peines susdites. Et d'autant que
 plusieurs de nos Iuges estimans que
 les peines susdites contre les delin-
 quans ne sont que comminatoires,
 se sont attribuez vn pouuoir de les
 diminuer ou remettre à leur volon-
 té: Nous leur defendons bien ex-
 pressément de ce faire pour l'adue-


nir, sur peine d'en répondre en leur propre & priué nom. **V O U L A N S** que tous ceux qui se trouueront auoir delinqué contre les defenses de nostre present Edit, & autres cy deuant faites pour cette matiere, soient condammnez és peines & amendes portées par nosdites Ordonnances, sans aucune remise ne moderation; reseruant à nous seul la grace & misericorde quand & à qui bon nous semblera de la faire: & voulons que tous Iugemens portans condamnation desdites amendes, ou punition corporelle, soient executoires nonobstant oppositions ou appellations quelconques; lesquelles amendes seront receuës par lesdits Receueurs presentement creez: desquelles, pour obliger lesdits Receueurs & Controolleurs à ce que nous ne soyons frustréz dudit droit,

nous auons fait don , & donnons
 par ces presentes, de la moitié des-
 dites confiscations, à quelques som-
 mes qu'elles se puissent monter.
 Tous lesquels Tresoriers , Rece-
 ueurs generaux , & Controolleurs
 dudit droit de Seigneuriage, qui se-
 ront par nous pourueus, seront re-
 ceus & prêteront le serment, sça-
 uoir nosdits Tresoriers en nostre
 Chambre des Comptes de Paris, &
 lesdits Controolleurs en nostredite
 Chambre, & en nostredite Cour
 des Monnoyes. **SI DONNONS**
EN MANDEMENT à nos amez &
 feaux les gens tenans nostredite
 Cour des Monnoyes, que ces pre-
 sentes ils fassent lire, publier & en-
 registrer, & le contenu en icelles
 garder & obseruer sans y contreue-
 nir, ny permettre qu'il y soit con-
 treuenue en aucune maniere, leur en
 ayant

ayant, entant que besoin est ou seroit, attribué & attribuons toute iurisdiction & connoissance, & icelle interdite à toutes autres nos Cours, & autres Iuges: CAR tel est nostre plaisir. Et afin que ce soit chose ferme & stable à tousiours, nous auons fait mettre à celsdites presentes nostre seel, sauf en autre chose nostre droit, & l'autrui en toutes. DONNE' à Narbonne au mois d'Avril l'an de grace 1642. & de nostre Regne le 32. Signé, LOUIS. Et plus bas, Par le Roy, DELOMENIE. & seellé de cire verte sur lacs de soye rouge & verte.

Et encore plus bas est écrit :

*Leues, publiées & registrées, oüy,
& ce requérant le Procureur general du
Roy, suiuant l'Arrest de ce iourd'huy à
Paris en la Cour des Monnoyes, le
dix-septième iour de Iuin 1642.*



EXTRAIT DES REGISTRES
de la Cour des Monnoyes.



Ev par la Cour les Lettres
 patentes du Roy en forme
 d'Edit, du mois d'Auril der-
 nier, signées, L O V I S. &
 plus bas, Par le Roy, DE-
 L O M E N I E, & seellées de cire verte
 sur lacs de soye rouge & verte, presen-
 tées au Bureau par le Procureur general
 de sa Majesté en ladite Cour, portant
 entre autres choses, creation en titre
 d'Office formé & hereditaire, de trois
 Conseillers ancien, alternatif, & trien-
 nal, Tresoriers Receveurs generaux
 du droit de Seigneuriage, ordonné par
 sa Maieité par autre Edit du mois de
 Septembre precedent, estre leué & payé
 par les Orfeures, Affineurs, Tireurs
 d'or & d'argent, & autres trauaillans
 desdites matieres, sur tous les ouurages
 qui sont & seront fabriquez & vendus
 dans l'étendue de ce Royaume hors les

Monnoyes: & de trois Conseillers aussi hereditaire Controolleurs generaux dudit droit, ancien, alternatif, & triennal; lesquels Offices neantmoins pourroient estre possédez par vne ou trois personnes, aux gages & droits y specifiez, à prendre sur les deniers prouenans dudit droit, à commencer du premier Ianuier de la presente année: Voulant sa Maiesté que lesdits Controolleurs puissent commettre par toutes les Villes où il y a maistrise d'Orfèurerie pour la marque & leuée dudit droit de Seigneuriage: & qu'il soit fait plusieurs poinçons semblables portans deux L L couronnées, pour la marque des ouurages & matieres d'or & d'argent, qui seront dorefnauant ouurées & venduës hors les Monnoyes: & que tous les ouurages d'Orfèurerie generalement quelconques, soient vieux ou nouueaux, qui sont & seront à l'aduenir ouurez hors les Monnoyes, & vendus vn mois apres la publication dudit Edit, ou exposez en vente, sans auoir esté enregistrez & marquez dudit poinçon, & acquitté ledit droit, seront confisquez, les vendeurs punis

corporellement & décheus de la maîtrise , & les acheteurs condamnés en l'amende. Et tous Orfèvres , Tireurs d'or & d'argent , & autres travaillans & trafiquans des menus ouvrages desdites matieres , sur lesquelles la contremarque des Lurez & Gardes ne s'applique , tenus d'en faire les pezuées au Bureau , pour après les avoir fait enregistrer , & signer audit registre , suivant icelles payer le droit avant que d'en pouvoir faire la vente , à peine de confiscation , & de punition comme dessus : & que tous Jugemens de condamnations , d'amende , ou punition corporelle , soient executoires nonobstant oppositions ou appellations quelconques : lesquelles amendes seront receuës par lesdits Receueurs ; desquelles , pour obliger lesdits Receueurs & Controolleurs à ce que sa Maiesté ne soit frustrée dudit droit , il fait don de la moitié desdites confiscations. Mandant à ladite Cour faire publier & registrer ledit Edit , à laquelle est attribué toute jurisdiction , & interdite à toutes autres Cours & autres Juges , & autres clauses plus à plein

contenuës audit Edit. Veu aussi l'Arrest du Conseil du douzième Mars audit an, par lequel sa Maieité ordonne, que par les Commissaires à ce deputez il soit procedé à l'establissement tant d'un Controolleur que dudit Bureau, pour l'enregistrement & marque dudit poinçon, iusques à ce qu'il ait esté pourueu ausdits Offices, & les pourueus receus en iceux, des Commis pour en faire l'exercice, & percevoir les droitz; à quoy les Gardes de l'Orféurerie tiendront la main: leur faisant defences de les troubler ny empêcher, à peine de dix mil liures d'amende, & d'estre responsables dudit droit pour toutes les matieres qui se trouueront vn mois apres la signification dudit Arrest à leurs personnes ou domiciles, n'estre marquez ny enregistrez par ledit Commis: Enioignant sa Maieité audit Procureur general, ses Substituts, Preuost general, Lieutenant, Exempts de la Preuosté generale des Monnoyes, de tenir la main à l'exécution dudit Arrest, nonobstant oppositions ou appellations quelconques, pour lesquelles, & sans y preiudicier,

ne fera differé; & dont si aucunes inter-
 uiennent, sadite Maiefté en attribué à
 ladite Cour la connoissance, & de ce
 qui pourroit arriuer sur l'establissement
 desdits Offices & Commis, & percep-
 tion des droits y attribuez, & l'interdit
 à toutes les autres Cours & Iuges, à pei-
 ne de nullité, & de dix mil liures d'a-
 mende contre les contreuenans. Com-
 mission de sadite Maiefté du quatriéme
 May aussi dernier, adressante à ladite
 Cour, par laquelle luy est mandé & or-
 donné, que conformément audit Arrest
 elle eust à proceder audit establissement
 d'un Bureau en cettedite ville de Paris
 pour la marque desdits ourages d'Or-
 féurerie, & de la personne de Maistre
 Pierre Bourdoys que sadite Maiefté a
 commis & commet pour marquer les-
 dits ourages, & receuoir ledit droit de
 Seigneuriage iusques à ce qu'il ait esté
 pourueu ausdits Offices, nonobstant
 oppositions ou appellations, pour les-
 quelles veut ledit establissement n'estre
 differé. De ce faire donne plein pou-
 uoir & mandement special; mesmes de
 deputer tels de ladite Cour pour établir

des Bureaux & Commis qui seront nommez par ledit Bourdoys, & dont il demeurera responsable, tant pour la marque desdits ouvrages, que perception dudit droit dans toutes les Villes de ce Royaume où besoin sera. Acte d'opposition des Maistres & Gardes de l'Orféurerie sur la verification dudit Edit de creation d'Officiers pour la perception du droit de Seigneuriage, ordonné estre leué sur leurs ouvrages, par autre Edit precedent du mois de Septembre; à la verification duquel ayant formé opposition, auroit esté ordonné qu'ils se pouruoiroient pardeuers sa Maiesté en son Conseil où l'instance est pendante, & pour les raisons qu'ils ont à déduire. Autre acte d'opposition audit Edit, de Maistre Philippes le Bret Receueur general des amendes & confiscations de ladite Cour, en ce qu'il porte que les amendes & confiscations qui seront iugées contre les contreuenans audit Edit, sera faite par les Tresoriers Receueurs creéz par ledit Edit, pour les causes qu'il entend déduire. Requeste dudit le Bret afin d'estre receu

en ladite opposition : ce faisant ordonner qu'il fera ladite recepte, pour payer & deliurer aux pourueus ausdits Offices la moitié à eux appartenans, suivant le-dit Edit, & le surplus employé au faict de sa charge. Conclusions dudit Procureur general, & ouy le rapport du Conseiller à ce commis. Tout considéré: LA COUR sans s'arrester aux oppositions desdits Maistres & Gardes de l'Orfévrie, & du Receueur des amendes & confiscations d'icelle, pour lesquelles ils se pouruoironnt pardeuers le Roy en son Conseil, a ordonné & ordonne que sur lesdites Lettres patentes en forme d'Edit du mois d'Auril dernier, sera mis qu'elles ont esté leuës, publiées, & registrées és registres de ladite Cour : & seront aussi lesdits Arrest du Conseil & Commission sur iceluy des douzième Mars, & quatrième May dernier, registrés ausdits registres, pour estre lesdits Edit, Arrest, & Commission executez, gardez & obseruez selon leur forme & teneur. Ce faisant, la leuée du droit de Seigneuriage sur les ouurages d'or & d'argent hors des Monnoyes, qui est de
six

liures pour chacun marc d'or, & sept
sols huit deniers vingt-vn troisiéme de
denier pour chacun marc d'argent, fai-
te suiuant & conformément à l'Edit du
mois de Septembre dernier, & Arrest
de verification d'iceluy du dix-huistié-
me Nouembre ensuiuant, à l'exception
& décharge des ouurages d'Orféurerie
d'or & d'argent necessaires aux Eglises
pour le Seruice diuin, specifiez audit
Arrest de verification; & aussi fors &
excepté sous le bon plaisir de sa Maiesté,
en ce qui concerne les Affineurs, &
pour auoir ledit Edit du mois d'Auril
lieu pour les ouurages d'Orféurerie qui
se feront cy-après, & sur les ouurages
cy-deuant faits, qui se trouueront mar-
quez du poinçon cōmun de l'Orféure-
rie de l'année courante, & qui sont &
se trouueront en la possession desdits
Orféures. Et quant à l'article dudit E-
dit pour les poinçons qui doiuent seruir
pour ledit droit à marquer lesdits ou-
urages: **ORDONNE** ladite Cour qu'il
sera fait par le Tailleur general des
Monnoyes de France, vne petite ma-
trice portant deux **L L** couronnées,

pour sur icelle leuer les poinçons & marques dont les Controolleurs & Commis se voudront aider, afin que par ce moyen ils soient tous semblables, & se puissent rengrener les vns sur les autres; comme venans d'un mesme moule & origine; & par ce moyen soit éuité aux falsifications qui s'en pourroient faire: ausquelles marques sera toutefois adiousté & graué au dessous sur chacun poinçon pour difference des Villes, sçauoir pour Paris la lettre A, & pour les autres Villes où il y a Monnoye, la lettre d'icelles qui se met pour les Espèces des monnoyes; & aux Villes où il n'y a Monnoye sera graué la premiere lettre du nom d'icelle: & en cas que ladite lettre se rencontre semblable à la premiere lettre du nom d'une Ville où il y a Monnoye, sera ladite lettre mise double à costé l'une de l'autre. Lesquels Controolleurs & Commis ne marqueront aucunes vaisselles ny ouvrages d'or & d'argent sinon de leursdites marques tirées de ladite matrice, sur peine de faux, payement du quatruple; & autres peines arbitraires: & sera ladite matrice


apportée au bureau de ladite Cour, & déposée au Greffe, & les poinçons tirez sur icelle, insculpez en vne table de cuivre qui sera audit Greffe, & déliurez par ledit Greffier audit Bourdoys, & autres Commis, en attendant que lesdits Treforiers Recueurs soient receus, & en sera dressé acte. Et pour ce qui regarde la peine ordonnée contre les vendeurs, expositeurs, & acheteurs desdits ouurages d'Orféurerie, vn mois apres la publication dudit Edit, sans auoir esté enregistré & marqué dudit poinçon, & ledit droit acquitté, en seront lesdits vendeurs tenus seulement: Qu'auant l'establissement des Bureaux, mesmes dudit Bourdoys Commis pour marquer lesdits ouurages, & receuoir ledit droit de Seigneuriage, & autres Commis qui seront nommez pour tout le Royaume, aussi en attendant qu'il soit pourueu aux Offices creéz par ledit Edit, feront le serment, sçauoir ledit Bourdoys en ladite Cour, de bien & fidelement exercer ladite Commission; & les autres Commis pardeuant le premier des Presidents ou Conseillers de ladite Cour

trouué sur les lieux , & en leur absence
 pardeuant les Generaux prouinciaux &
 Gardes des Monnoyes de ce Royaume ,
 & à leur defect pardeuant les Baillifs ,
 Seneschaux, Preuosts, & autres Iuges
 Royaux, dont les actes seront enuoyez
 en ladite Cour dans vn mois du iour de
 la prestation dudit serment, à peine de
 nullité de ce qui sera par eux fait. Et
 ayant égard aux conclusions du Procureur
 general sur l'article pour la recepte
 des amendes & confiscations, prou-
 uées des condamnations contre les con-
 treuenans audit Edit; ordonne que la-
 dite recepte en sera faite par ledit Rece-
 ueur general des amendes & confisca-
 tions de ladite Cour, à la charge de
 payer & déliurer la moitié des confisca-
 tions aux Receueurs & Controolleurs
 chacū en leur année d'exercice, & d'em-
 ployer le surplus au faict de sa charge :
 Et que les pourueus ausdites charges de
 Tresoriers & Receueurs seront tenus de
 se faire receuoir & prester le serment en
 ladite Cour comme les Controolleurs.
 Et pour proceder à l'establissement tant
 dudit Bureau en cette ville de Paris

pour la marque desdits ouurages d'Orféurerie, que de la personne dudit Bourdoys, pour marquer lesdits ouurages & receuoir ledit droit de Seigneuriage, suiuant lesdits Arrest & Commission du douzième Mars, & quatrième May derniers, ladite Cour a commis & commet le sieur de Lyonne Conseiller du Roy en ses Conseils, & President en ladite Cour, & Maistres Iean Desprez & Louis Vaudin Conseillers en icelle. Et à ce qu'aucun n'en puisse prétendre cause d'ignorance, lesdits Edit, Arrest du Conseil, & Commission; ensemble le present Arrest seront à la requeste dudit Procureur general, monstrez, signifiez, & d'iceux baillé copie ausdits Maistres & Gardes de l'Orféurerie de cette Ville, ou à deux d'entre eux, à leurs personnes ou domiciles; ausquels est enioint le faire sçauoir, lire, & publier trois-iours apres en leur Chambre commune, la Communauté des Maistres Orféures pour ce à la diligence desdits Gardes conuoquée & assemblée en la maniere accoustumée, dont ils certifieront la Cour le iour ensuiuant auoir ce

fait par leur procez verbal, signé d'eux, qu'ils apporteront au Bureau de ladite Cour, & demeurera au Greffe. FAIT en la Cour des Monnoyes le dix-septième Iuin mil six cens quarante-deux.

Signé, DELAISTRE.



EXTRAIT DES REGISTRES
du Conseil d'Estat.

S V R la Requête présentée au Roy en son Conseil par Hallé, Guillaume Reuersé, Iean Bretheau, François Lescot, Iean Preuost, & Cottart, Maistres & Gardes del'Orféurerie de Paris, de present en charge; contenant qu'il leur est du tout impossible de tenir registre & controolle de tous les ou-

urages & matieres d'or & d'argent
qui seront apportées en la maison
commune des Orféures , & de les
contremarquer du poinçon Royal :
comme aussi de faire la recepte du
droit de Seigneuriage sur lesdites
matieres d'or & d'argent, ainsi qu'il
leur a esté ordonné par Arrest du
Conseil du trentième Juillet der-
nier, attendu qu'ils sont continuel-
lement occupez à faire les essays des-
dites matieres , & les marquer de
leur poinçon. Et que d'ailleurs ce
feroit les rendre comptables & re-
sponsables de deniers Royaux , &
les exposer avec leurs familles, non
seulement aux rigueurs des con-
traintes en tel cas accoustumées: mais
aussi aux chicaneries d'un Fermier
dudit droit de Seigneuriage, à cause
des comptes qu'ils seroient obligez
de luy rendre de temps en temps, &

principalement s'ils demeuroient
 responfables conformément audit
 Arrest, des ouurages & matieres
 d'or & d'argent qui se trouueroient
 n'estre point marquez ny enregi-
 strez; estant tres-difficile qu'ils puis-
 sent empêcher quantité de compa-
 gnons Orféures; mesmes aucuns
 des Maistres dudit mestier, & ap-
 prentifs, de fabriquer en secret des-
 dites matieres d'or & d'argent dans
 l'enclos de Sainct Denys de la Char-
 tre, Sainct Iean de Latran, le Tem-
 ple, les Colleges de Paris, Galleries
 du Louure, les Maisons des Princes,
 l'Arsenal, Maisons Conuentuel-
 les, Fauxbourgs de Paris, & dans
 la ville de Sainct Denys en France,
 & autres lieux cachez où lesdits
 Maistres & Gardes n'ont pas la li-
 berté d'entrer pour saisir lesdits ou-
 urages d'Orféurerie, qui se fabri-
 quent

quent au preiudice des Ordonnan-
ces. Requerans sa Maiesté sur ce
leur pouruoir; & en ce faisant or-
donner qu'ils demeureront déchar-
gez de l'execution dudit Arrest: Que
le Bureau pour la marque dudit
poinçon sera estably en l'Hostel de
la Monnoye, ou tel autre lieu qu'il
plaira à sa Maiesté; auquel Bureau
les Maistres Orféures seront tenus
de porter les ouurages qu'ils feront,
pour estre par celuy que sa Maiesté
y commettra enregistrez & mar-
quez du poinçon Royal suiuant l'E-
dit du mois d'Auril dernier, & Ar-
rest de verification en la Cour des
Monnoyes, & de payer ledit droit
de Seigneuriage; pour apres estre
lesdits ouurages apportez par lesdits
Maistres Orféures en ladite Maison
commune de l'Orféurerie, & cōtre-
marquez du poinçon d'icelle par les-

dits Gardes ; se soufmettans en ce
 cas de ne faire les essays, ny appli-
 quer leurs contremarques sur lesdits
 ouurages qu'ils ne soient prealable-
 mēt marquez dudit poinçon Royal
 au Bureau estably pour cēt effet. Veu
 ladite Requête : ledit Arrest du
 Conseil du trentième Juillet dernier :
LE ROY EN SON CONSEIL ayant
 égard à ladite Requête, & submis-
 sions desdits Maîtres & Gardes, les
 a déchargez & décharge de l'execu-
 tion dudit Arrest du trentième Jul-
 let dernier. Ordonne sadite Maie-
 sté que tous les Maîtres Orféures de
 ladite ville de Paris seront tenus
 d'apporter les ouurages qui seront
 doresnauant ouurez & fabriquez, au
 Bureau estably en l'Hostel de la
 Monnoye, pour y estre enregistrez
 & marquez du poinçon Royal, dont
 ils payeront comptant le droit de

Seigneurage, suiuant lesdits Edit & Arrests dōnez en consequence; sans qu'à l'aduenir aucun desdits Orféures puissent vendre ny ouurer aucune vaisselle & autres ouurages d'or & d'argēt, que ledit poinçon Royal n'y ait esté appliqué, sur peine de confiscation desdits ouurages, de cinq cens liures d'amende, payable sans deport, & estre décheus de leurs Maistrises. Enioignant sadite Maieité aux Maistres & Gardes, de ne faire doresnauant aucuns essays desdites matieres d'or & d'argent, ny d'appliquer sur icelles leurs contre-marques, qu'au prealable il ne leur ait apparu du payement dudit droit, & de la marque dudit poinçon Royal, & d'appliquer leur dite contre-marque immédiatement auprès la marque dudit poinçon, à peine de dix mil liures d'amende, execu-

toire solidaiement contre lesdits Maistres & Gardes presens & à venir, & estre décheus de leurs charges de Gardes ; avec defenses de s'immiscer en icelles sur les mesmes peines. Et au cas que lesdits ouurages qui auront payé ledit droit de Seigneuriage, ne se trouuent par lesdits Maistres & Gardes au titre de l'Ordonnance, & que lesdits ouurages ayent esté difformez & rompus par lesdits Maistres & Gardes, en rapportant audit Commis lesdits ouurages rompus, ce qui aura esté payé pour ledit droit sera à l'instant rendu. Et afin que sadite Maiesté ne soit doresnauant frustrée du payement dudit droit, ordonne sadite Maiesté ausdits Maistres & Gardes de porter presentement à ladite Cour des Monnoyes le poinçon portant la lettre X, pour estre dif-

formé; au lieu duquel leur sera donné par ladite Cour vn autre poinçon portant la lettre Y, pour seruir à leur contremarque durant le temps qui reste de leur charge. **ORDONNE** en outre sadite Maiesté à

de la Haye Maistre Orféure de ladite Ville, de remettre incontinent apres la signification qui luy sera faite du present Arrest, au Greffe de la Cour des Monnoyes ledit poinçon Royal dont il a esté chargé par Arrest de ladite Cour, pour estre mis és mains du Commis par sa Maiesté à la recepte dudit droit. Et pour empêcher les abus & maluersations qui se commettent par lesdits Maistres, Compagnons, & Apprentifs dudit mestier, qui fabriquent en secret desdits ouurages dans ladite ville de Paris, & en celle de Sainct Denys, & autres lieux où lesdits Maistres &

Gardes ne peuuent faire leurs visites : FAIT sadite Maieſté deſenſes auſdits Maiſtres Orféures, Compagnons, & Apprentiſs dudit meſtier, & autres traueillans es ouurages d'or & d'argent, d'en fabriquer aucuns dans leſdits lieux, qu'apres les eſſays faits des matieres par leſdits Maiſtres & Gardes, à peine de punition corporelle, & de conſiſcation deſdits ouurages: Permettant ſadite Maieſté auſdits Maiſtres & Gardes dudit meſtier de faire leurs viſites dans leſdits lieux, & par tout où bon leur ſemblera; meſmes de faire mettre leſdits Maiſtres, Compagnons, & Apprentiſs dudit meſtier contreuenans au preſent Arreſt, priſonniers, pour eſtre punis ſuiuant la rigueur des Ordonnances: & pour l'exécution du preſent Arreſt ſera expedie & deliuré toutes Lettres de Decla-

ration necessaires. M A N D E sadite
 Maiesté à son Procureur general en
 ladite Cour des Monnoyes, de te-
 nir la main, qu'aucun Orféure ne
 puisse estre receu au serment de la
 charge de Garde, que premieremēt
 il ne leur ait esté fait lecture du pre-
 sent Arrest, afin qu'il n'en pretende
 cause d'ignorance; & de le faire exe-
 cuter selon sa forme & teneur, non-
 obstant oppositions ou appellatiōs
 quelconques: desquelles si aucunes
 interuiennent, sadite Maiesté en at-
 tribuē la connoissance à ladite Cour,
 & icelle interdite à toutes autres
 Cours & Iuges. FAIT au Conseil
 d'Estat du Roy tenu à Paris le cin-
 quième iour de Nouembre mil six
 cens quarante-deux.

Signé, LE R A G O I S.


LOVIS par la grâce de Dieu
 Roy de France & de Nauarre,
 à nosamez & feaux Conseillers les
 gens tenans nostre Cour des Mon-
 noyes, Salut. Nous vous mandons
 & ordonnons de faire registrer, gar-
 der, & executer l'Arrest dont l'ex-
 trait est cy attaché sous le contreseel
 de nostre Chancellerie, donné en
 nostre Conseil d'Estat le cinquième
 iour du present mois, par lequel
 nous auons déchargé les Maistres &
 Gardes de l'Orféurerie de Paris de
 present en charge, de l'execution
 d'autre Arrest de nostredit Conseil
 du trentième Iuillet dernier, con-
 cernant le droit de Seigneuriage sur
 les matieres d'or & d'argent, qui se-
 ront enregistrees & marquées du
 poinçon Royal, nonobstant oppo-
 sitions ou appellations quelcon-
 ques, dont si aucunes interuiennent

nous

nous vous en attribuons la connoissance, & l'interdisons à toutes nos Cours & autres Iuges. Enioignons à nostre Procureur general en nostre dite Cour, de tenir la main à ce qui luy est ordonné par ledit Arrest cy-attaché ; lequel nous commandons au premier nostre Huissier ou Sergent sur ce requis, de signifier à tous qu'il appartiendra à ce qu'ils n'en pretendent cause d'ignorance, & faire pour l'exécution d'iceluy tous commandemens, sommations, injonctions & defenses, sur les peines y contenuës, & tous autres actes & exploits necessaires, sans demander autre permission : & sera adiousté foy, comme aux originaux, aux copies dudit Arrest, & des presentes collationnées par l'un de nos amez & feaux Conseillers & Secretaires : CAR tel est nostre plaisir.

DONNÉ à Saint Germain le huitième iour de Nouembre l'an de grace mil six cens quarante-deux, & de nostre Regne le trente troisième. Signé, LOVIS. Et plus bas, Par le Roy, DELOMENIE.

*EXTRAIT DES REGISTRES
de la Cour des Monnoyes.*

 EV par la Cour l'Arrest du Conseil d'Estat du Roy du cinquième du present mois, Signé, LE R A G O I S, intervenu sur la Requête présentée à sa Maiesté en son Conseil par Hallé, Guillaume Reuerfè, Jean Breteau, François Lescot, Jean Preuost, & Jacques Cottard, Maistres & Gardes de l'Orféurerie de cette ville de Paris, de present en charge; par lequel sa Maiesté en sondit Conseil, ayant égard à ladite Requête & submissions desdits Maistres & Gardes, les a déchar-

gez & décharge de l'exécution de l'Arrest du trentième Juillet dernier, & ordonné que tous les Maistres Orfèvres de ladite Ville seront tenus de porter les ouvrages qui seront doresnavant ouurez & fabriquez, au Bureau estably en l'Hostel de la Monnoye, pour y estre enregistrez & marquez du poinçon Royal, dont ils payeront comptant le droit de Seigneuriage, suiuant les Edit & Arrests donnez en consequence; sans qu'à l'aduenir aucun desdits Orfèvres puisse vendre ny ouurer aucune vaisselle & autres ouvrages d'or & d'argent, que le poinçon Royal n'y ait esté appliqué, sur peine de confiscation desdits ouvrages, cinq cens liures d'amende payables sans depest, & décheus de leurs maistrises. Et enioint aux Maistres & Gardes de ne faire doresnavant aucuns essays desdites matieres d'or & d'argent, ny d'appliquer sur icelles leur cōtremarque, qu'au prealable il ne leur ayt apparu du payement dudit droit, & de la marque dudit poinçon Royal, & d'appliquer leur dite contremarque immédiatement apres la marque d'iceluy poinçon, à peine de dix

mil liures d'amende, executoire solidai-
 rement contre lesdits Maistres & Gar-
 des presens & à venir, & d'estre décheus
 de leurs charges de Gardes; avec defen-
 ses de s'immiscer en icelles, sur les mes-
 mes peines: Et au cas que lesdits ouura-
 ges qui auront payé ledit droit de Sei-
 gneurage, ne se trouuent par lesdits
 Gardes au titre de l'Ordonnance, &
 que lesdits ouurages ayent esté diffor-
 mez & rompus par lesdits Maistres &
 Gardes, en rapportant audit Commis
 lesdits ouurages rompus, ce qui aura esté
 payé pour ledit droit sera à l'instant ren-
 du. Et afin que sadite Maieité ne soit
 doresnauant frustrée dudit paiement
 dudit droit, ordonne ausdits Maistres
 & Gardes de porter presentement en la
 Cour des Monnoyes le poinçon de la
 lettre X, pour estre difformé; au lieu
 duquel leur sera donné par ladite Cour
 vn autre poinçon portant la lettre Y,
 pour seruir à leur contremarque durant
 le temps qui reste de leurs charges: & à
 René de la Haye Maistre Orféure en la-
 dite Ville, de remettre incontinent a-
 pres la signification qui luy sera faite du

dit Arrest, au Greffe de ladite Cour des Monnoyes ledit poinçon Royal dont il a esté chargé par Arrest de ladite Cour, pour estre mis és mains du Commis par sa Maieité à la recepte dudit droit. Et pour empêcher les abus & maluerfactions qui se commettent par les Maistres, Compagnons, & Apprentifs, dudit mestier, qui fabriquent en secret desdits ouurages dās ladite ville de Paris, & en celle de Saint Denys, & autres lieux où lesdits Maistres & Gardes ne peuvent faire leurs visites: sadite Maieité fait defences ausdits Maistres Orféures, Compagnons, Apprentifs dudit mestier, & autres trauaillans és ouurages d'or & d'argent, d'en fabriquer aucuns dās lesdits lieux, qu'apres les essays faits des matieres par lesdits Maistres & Gardes, à peine de punition corporelle & de confiscation desdits ouurages: Permettant sadite Maieité ausdits Maistres & Gardes dudit mestier, de faire leurs visites dans lesdits lieux, & par tout où bon leur semblera; mesmes de faire mettre lesdits Maistres, Compagnons, & Apprentifs dudit mestier, contreue-

nans au present Arrest, prisonniers, pour estre punis suiuant la rigueur des Ordonnances. Mandant sadite Maieſté à son Procureur general en ladite Cour, de tenir la main, qu'aucun Orféure ne puisse estre receu au serment de la charge de Garde, que premierement il ne leur ayt esté fait lecture du present Arrest, afin qu'ils n'en pretendent cause d'ignorance, & de le faire executer selon sa forme & teneur, nonobstant oppositions ou appellations quelconques; desquelles, si aucunes interuiennent, sadite Maieſté en attribué la connoissance à ladite Cour, & interdit icelle à toutes autres Cours & Iuges. Commission sur ledit Arrest, donnée à Saint Germain le huitième du present mois, signé, LOVIS. Par le Roy, DE LOMENIE, & scellé de cire iaune du grand seal sur simple queue: par laquelle est mandé à ladite Cour faire registrer, garder, & executer ledit Arrest. Conclusions du Procureur general du Roy: ouy le rapport du Conseiller à ce commis. Tout considéré: LA COUR a ordonné & ordonne, que ledit Arrest du Conseil dudit

iour cinquième dudit present mois, & Commission sur iceluy du huiſtième dudit mois, ſeront registrez au Greſſe de ladite Cour, pour eſtre executez ſelon leur forme & teneur : & qu'en ce faiſant les nommez Hallé & Cottard, deux deſdits Maîtres & Gardes de l'Orféurerie de cette ville de Paris, eſtans de present en charge, ſeront tenus d'apporter dans demain dix heures du matin, à ladite Cour ledit poinçon portant la lettre X, & ledit de la Haye ledit poinçon Royal, ſur les peines portées par leſdits Arreſt & Commission. FAIT en la Cour des Monnoyes le dix-neufième iour de Novembre mil ſix cens quarante-deux.

Signé, DELAISTRE.

Collationné aux originaux par moy Conſeiller
 Secrétaire du Roy, & de ſes Finances, &
 Greſſier en chef de la Cour des Monnoyes.

Handwritten text in a cursive script, likely from a 17th or 18th-century manuscript. The text is arranged in approximately 15 lines, though many characters are illegible due to fading and the quality of the reproduction. The script is dense and flowing, characteristic of the period.

Handwritten text in a cursive script, continuing from the upper section. This block contains approximately 10 lines of text, which is also largely illegible. The handwriting remains consistent with the upper section, showing a high level of cursive fluency.